

Na osnovu čl. 5. i 12. Zakona o Agenciji za privatizaciju ("Službene novine Federacije BiH", broj 18/96), člana 11. Zakona o privatizaciji preduzeća ("Službene novine Federacije BiH", broj 27/97), te čl. 8. i 17. Pravilnika o postupku prodaje imovine i dionica ili udjela preduzeća, člana 16. Statuta Agencije za privatizaciju u Federaciji BiH, Upravni odbor Agencije za privatizaciju u Federaciji BiH, na sjednici održanoj 28. aprila 1998. godine, donio je

## **UPUTSTVO O IZBORU, IMENOVANJU I IZDAVANJU DOZVOLA AUKCIONERIMA**

### **Član 1.**

Aukcioner u smislu ovog uputstva može biti pravno sposobna osoba, državljanin Bosne i Hercegovine, koji ispunjava Zakonom propisane opće i posebne uslove, te uslove propisane Pravilnikom o postupku prodaje imovine i dionica ili udjela preduzeća i ovim uputstvom. Aukcioneri se registruju i vode u evidenciji Agencije za privatizaciju u Federaciji BiH (u daljem tekstu: Agencija Federacije), i izdaje im se dozvola za provođenje aukcije.

### **Član 2.**

Najniži stepen obrazovanja, neophodan za aukcionera, je četvrti stepen obrazovanja (SSS). Kandidati za aukcionera dužni su završiti kurs za aukcionere. Kurs za aukcionere organizovat će Agencija Federacije u saradnji sa kantonalnim Agencijama. Kandidate za pohađanje kursa utvrđuju kantonalne Agencije, i spisak utvrđenih kandidata dostavljaju Agenciji Federacije.

### **Član 3.**

Kandidati za aukcionere dužni su priložiti dokaz od ovlaštenog suda da se protiv njih ne vodi krivični postupak i da nisu kažnjavani.

### **Član 4.**

Po završetku kursa Agencija Federacije će za polaznike organizovati polaganje ispita, a prema programu koji sadrži slijedeće elemente:

- provjera osnovnih elemenata pismenosti i poznavanje jezika;
- provjera osnova društveno-ekonomskog sistema u BiH;
- provjera osnova propisa koji regulišu privatizacijski postupak;
- provjera komunikacijskih i govorničkih sposobnosti;
- provjeru osnova matematike;
- provjera moralno-etičkih stavova.

### **Član 5.**

Kandidati koji uspješno polože ispit, nakon pohađanja kursa stiču zvanje "Pomoćnik aukcionera" i dobivaju dozvolu za aukcionera, koju propisuje i izdaje Agencija Federacije. Pomoćnici aukcionera koji uspješno održe tri samostalne probne aukcije organizovane od Agencije Federacije u saradnji sa agencijama kantona, unapređuju se u zvanje "Aukcioner". Prema pokazanom uspjehu na ispitu za aukcionere i probnim aukcijama Agencija Federacije, u saradnji sa kantonalnim agencijama odabrat će i imenovati aukcionere sa zvanjem "Principal

aukcioner", koji može voditi javne aukcije za predmete čija početna cijena iz kataloga ne prelazi 100.000 KM.

#### **Član 6.**

Dozvola iz člana 5. ovog uputstva sadrži:

- lične podatke o imaoocu dozvole;
- sliku;
- zvanje ranga aukcionera (pomoćnik aukcionera, aukcioner, principal aukcioner);
- žig i potpis ovlaštene osobe u Agenciji Federacije.

#### **Član 7.**

Utvrđenu listu pomoćnika aukcionera, aukcionera i principal aukcionera, Agencija Federacije dostavlja kantonalnim agencijama.

Sa ove liste kantonalna agencija imenuje ovlaštene aukcionere u skladu sa članom 17. Pravilnika o postupku prodaje imovine i dionica ili udjela preduzeća, i listu imenovanih dostavlja Agenciji Federacije.

#### **Član 8.**

Aukcioner obavlja javnu aukciju shodno odredbama Pravilnika o postupu prodaje imovine i dionica ili udjela preduzeća.

Aukcioneri u obavljanju svojih dužnosti saraduju sa Komisijom iz člana 7. Pravilnika o postupku prodaje imovine i dionica ili udjela preduzeća.

Aukcioner tokom aukcije zastupa i štiti interese prodavca.

#### **Član 9.**

Aukcioner je dužan prije početka aukcije obavijestiti Komisiju o postojanju prepreka iz člana 42. stav 2. pravilnika i tražiti izuzeće.

#### **Član 10.**

Aukcioner može uzastopno obaviti najviše pet (5) javnih nadmetanja za prodaju predmeta aukcije. Nakon toga određiće mu se zamjena u trajanju od najmanje sat vremena.

Za sva sporna pitanja u toku jednog nadmetanja, aukcionar će zatražiti pomoć Komisije.

Aukcioner nije odgovoran za postupke kupca nakon pada čekića i proglašenja pobjednika nadmetanja.

#### **Član 11.**

Organizator javne aukcije (kantonalna agencija) dužna je obaviti sve pripreme za uspješno održavanje javnog nadmetanja.

Organizator je dužan pripremiti aukcijski centar i opremiti ga odgovarajućom tehničkom opremom koja omogućuje aukcioneru obavljanje javnog nadmetanja.

Organizator je dužan osigurati predstavnike ovlaštene institucije za održavanje reda i mira u aukcijskom centru.

#### **Član 12.**

Organizator javne aukcije platiće odgovarajuću naknadu za angažovanje aukcionera i to:

- za pomoćnika Aukcionera u dnevnom iznosu od 80,00 KM
- za Aukcionera u dnevnom iznosu od 120,00 KM
- za Principal Aukcionera u dnevnom iznosu od 150,00 KM

Naknada se isplaćuje u gotovu, neposredno nakon završetka aukcije. Ukoliko se aukcijski centar nalazi 50 i više kilometara udaljen od mjesta prebivališta aukcionera, organizator će aukcionaru osigurati odgovarajući hotelski smještaj (spavanje u jednokrevetnoj sobi i doručak).

#### **Član 13.**

Ukoliko aukcioner ili njegov pomoćnik vode javno nadmetanje protivno odredbama Pravilnika i Pravila o javnim aukcijama, Komisija će ga momentalno opozvati i zamijeniti drugim, te podnijeti prijavu Agenciji Federacije.

#### **Član 14.**

Ukoliko Agencija Federacije utvrdi postojanje odgovornosti aukcionera, može mu izreći disciplinske mjere u okviru svojih zakonskih i u općim aktima propisanih ovlaštenja, a u slučaju da se dogode povrede koje Zakon kvalifikuje kao kažnjiva djela vodit će se po Zakonskim važećim propisima predviđen postupak.

#### **Član 15.**

Izmjene i dopune ovog uputstva donose se na način predviđen za njegovo donošenje.

#### **Član 16.**

Ovo uputstvo stupa na snagu danom objavljivanja u "Službenim novinama Federacije BiH".